

IN CORT DI PAISAN

A g'a n'è tanti ancamò di cort in dal nost piccol ma bèll paes, disèm che al merit a l'è da le Belle Arti e a l'è content l'Orenes, però hann fà in temp a sgiaccà giù la cort dal Vadan e dal Mirèl, per fabbricà ona specie da condominio c'a l'è minga n'anca bèll,

bisogna di che adèss i cort a in stà on poo tùcc mudificaa, per forza: con i temp c'à corr incoeu, hann cercà da rangià, invece ona volta, in qualsiasi cort a gh'era on quei paisàn e andavan e vignevan cont i cavai, o asnit, pien da stràm,

e senza vorè, la pulizia a la sa faseva desiderà on momentin, perchè in di cort a girava anadit, puresit, purscel e gain, a sa poteva immaginas che sporcizia a gh'era in da tutt i cortil, ma bisogna di che vèrs sera, dopo tutt, a l'era nètt dappertutt,

minga da cred che ona volta a eran tutt di vunciuni la gent, a gh'era altri metodi per fà la pulizia e eran di vulpùni, pensii che per fà la bugada, a ciappàvan on sac cont su la scendra, a la colavan in di segiùn o mastei, ona spasetada e a ritornavàn bèi,

e poo l'acqua potabil nissun a gh'ha l'era in cà, n'anca i servizi, al si perchè? I nost vegett a disevan che per lur a eran tutt vizzi e siccome che al rubinètt al sa troava in mèzz da la cort, i dòn, andavan giù cont i sidèi a tò l'acqua perchè gh'ha l'eran bisogn

e poo a l'adoperavan da bev, da mangià, da fregà sù, e da lavà, se a ta sa lavavat in dal segiùn, a g'à na voreva on quei bidòn, quanti volt che mia mam a la ma ciamava per dam i sidèi in di màn, e minga brontolà, sedenò, on quei sgiaffòn a sa poteva ciappaa.

In da la mia cort poo "quella dal Pulvara" a gh'era anca on pozz, a l'hann tirà via, pecaa, perchè a l'era frèsc l'acqua d'èsta, e al sa trovava propi in mèzz al divisorì da quella di Mirèi quindi, anca lor a sa servivan, bisognava vedè come a l'era bèll,

me pà al ma diseva che di pozz a g'a nera tanti chì a Oren, a eran indispensabil, specialment in da tutt i nost cassin e a ma ricordi che quand a seri a fò andavi semper a la Cavallera, a portavi adree ona damigianèta e a tiravi sù l'acqua frèsc e neta,

in poc paroi a l'era al solit tràn tràn per al nost pover paisàn e anca se al viveva in d'on cortil, cont tùcc a l'era galante e gentil, a l'era spontaneo e natural al sò comportament, e in puu disem: chi andava a troval in cà sua, al gh'ha dava, lacc pecc e la cua.

Però la cattiveria a la esisteva no, specialment tra bagaiòt, in dal vestis a gh'era nissuna esigenza, a giravam con i sucuròt, perchè i scarp ai mettevum su solament ai fèst da precètt, oppur, durant la settimana sa t'andavat a fa al cereghètt.

A l'inverno per tignì a man e minga trasà i legn, o al carbòn, a sa lasciavan in da la stalla e ognun in dal sò cantòn e mè misee cont al tabàr adòss al controlava tutta la situaziòn, a eran guai per num bagai se a sa movevum dal nòst cantòn,

e poo bisognava pregà per i viv e i mort cont ona bèlla corona e tùcc a serum obbligà a recità, sedenò, al ma faseva sègn d'andà, aspèttavum che al sà indormentava per podè fa ona quei bacarada, ma se nel caso al sa desedava, al ma lasciava adree ona sciavatada,

e pur num bagai a serum content, anca sà gh'era tanta rigidità, sicura che al sistema d'ona volta incoeu a ta poo no fall funzionà e bisogna minga di c'a l'è al progress, a ma disevan i nost vegett: c'a eran in gamba quei da Oren, perchè a eran onest gentil e genuin,

Come al saria bèll a ritornà indree, solament on momentin, anca per fà capii a tutta la gioventù, come a sa viveva a Oren. Ona roba a l'è cèrta: ai nost temp, a gh'era pussee umanità, invece adèss: a sèm diventà egoista, e tùcc a cercàn da gratà.